


PLEIV TUJETSCH



Rapport annual 2004

Invitaziun

alla radunonza dalla Pleiv da Tujetsch
gliendisdis, ils 6 da zercladur 2005 allas 20.15 uras
en casa da scola a Rueras

Tractandas:

Avertura e beinvegni


1. Elecziun da dus dumbravuschs
2. Protocol dalla radunonza extraordinaria dils 5 d'avrel 2004
3. Protocol dalla radunonza generala dils 14 da zercladur 2004
4. Protocol dalla radunonza extraordinaria dils 21 da december 2004
5. Rapport dil president dalla pleiv
6. Rapport dalla presidenta dil Cussegl pastoral
7. Rendaquen, rapport dils revisurs ed approbaziun dil quen 2004
8. Preventiv e fixar il pei da taglia per igl onn 2005
9. Elecziun dil Cussegl pastoral
10. Orientaziuns
11. Varia

Vus tuts, preziadas parochianas e preziai parochians da nossa pleiv essas cordialmein envidai a questa radunonza. Ei legrass nus zun fetg da saver beneventar in numerus diember da commembers.

En num dalla suprastonza da pleiv Tujetsch

Il president:
Tadeus Giossi

La vicepresidenta:
Ursulina Cavegn-Bisquolm



A tutsAs parochiansAs
da nossa Pleiv

Amplificaziun dalla gliesta da tractandas

Preziai parochians

Demai ch'igl ei buca pusseivel da tener giu sco stau previu ina radunonza comunablamein cun tala dalla vischnaunca, essend che lezza ha liug pér suenter la radunonza generala dalla Pleiv, essan necessitai dad amplificar sco suonda la gliesta da tractandas, savend cheutras evitar da clumar aunc inagada il pievel ad ina radunonza extraordinaria:

AMPLIFICAZIUN

- Tractanda:
10. Contract da vendita e contract da concessiun en dretg da bagegiar cun la vischnaunca:
 - a) Vendita parcella prau "Dulezi"
(nra. 1203 e 1248m2 dalla parcella 2707)
 - b) Contract da concessiun en dretg da bagegiar dil rest dalla parcella 2707
 11. Orientaziuns
 12. Varia

7188 Sedrun, 19.05.2005

PLEIV CATOLICA TUJETSCH
La suprastonza

Protocol

Radunonza extraordinaria a caschun dalla renovaziun dalla baselgia s. Vigeli a Sedrun, gliendisdis ils 05-04-04 allas 19.30 uras ell'aula da scola a Sedrun

Tractandas

1. Beinvegni ed avertura entras il president dalla pleiv
2. Elecziun da dus dumbravuschs
3. Presentaziun dil project entras il president dalla cumissiun ed igl architect
4. Posiziun suprastonza
 - a) informaziun dil president
 - b) informaziun finanzas entras il cassier
5. Discussiun
6. a) realisaziun dalla renovaziun
 - b) conceder il credit necessari
7. Conclus
8. Varia

Tractanda 1

Il President dalla pleiv, Tadeus Giossi arva la radunonza e beneventa en emprema lingua sur Alexi Manetsch, la suprastonza communal, signur Indergand sco era tuttas parochianas e parochians. El presenta a tuts presents ils commembers dalla cumissiun che consista ord il president Tarcisi Hendry, Mudest Venzin ed Ursulina Cavegn. La suprastonza dalla pleiv ha dau ad els l'incarica da prender si tuttas caussas ch'ei en vesta per ina renovaziun ni sanaziun dalla baselgia e presentar ellas en fuorma d'in sboz, per aschia saver calcular e presentar grobamein cefras. Tadeus Giossi metta avon a nus signur Indergand, architect specialisau sin objects sacralis e specialist per tgras da monuments.

Tractanda 2

Sco dumbravuschs vegnan elegi signura Loretz Rebecca e signur Marcel Schmid.

Tractanda 3

Il president dalla cumissiun Tarcisi Hendry declara cun agid tecnic pass per pass lur ideas co la cumissiun metta avon quella renovaziun. Signur Indergand surpren il plaid era per dar in detagliau ed entelgeivel sclariment sur dalla renovaziun baselgia principalmein sco els vesessen tala. El engrazia al Tarcisi Hendry per sia informativa, interessanta

e bein preparada lavur. Signur Indergand declara detagliadamein co el vesa quella sanaziun, entschiet cun ils mirs che hagian pitiu considerablamein dalla humiditad sco era dil scaldament, las installaziuns electricas e buca sco davos la pli interessanta part dalla renovaziun, ils altars ch'ein nuncapeivlamein tier la davosa renovaziun digl onn 1934 vegni cuvretgs cun color cotschna. Quella restauraziun ei lu era la pli cara part dalla restauraziun interna, demai ch'ins vul metter ils altars anavos el stan d'origin ch'ein da ses onns vegni baghegiai en stil baroc da Johannes Ritz anno 1702. Igl architect presenta a tuts il plan da finanziaziun cun ina summa dad 1,697 milliuns francs. Ei seigi denton calculau tut sigl ault. Plinavon fa signur Indergand attents che senza nies conclus davart la suprastonza sappi el buca presentar damondas per sustegn finanziel tier instanzas publicas sco cantun e confederaziun, baselgias Svizras etc., sco era tier fundaziuns ed instituziuns. Tarcisi Hendry declara a tuts presents co agir vinavon en autras caussas. Sco per exempel co far diever dalla baselgia duront la restauraziun demai ch'ins quenta cun quella renovaziun entochen igl onn 2005. Gest igl onn 2005 astga la baselgia s. Vigeli festivar siu giubileum dad 800 onns, aschia ch'ei fuss atgnamein il giavisch dalla cumissium da saver presentar la baselgia restaurada sin quei giubileum, quei seigi denton buca decisiv manegia el. Cun quell'informaziun seigi el alla fin da sia presentaziun e surdat il plaid a Tadeus Giossi cun denton supplicar il pievel cheu present d'aver curascha e fidonza en caussa.

Tractanda 4

a)

Nies president pren posiziun per la surstada dallas enormas cefras. Tonaton manegia el da trer atras ina renovaziun totala demai che quella caschun sedetti segiramein buca pli. Ils altars vegnien aschia ni aschia dismantai ed ei fussi in'ortgadad da buca metter gest en quei mument els el stan d'origin. Naturalmeins cuosti quei frs. 300'000.00 dapli che vegnien probablamein ad esser il pass da scarpetsch vid l'entira caussa. Necessari ni buc. Nies president appellescha d'aver curascha e confidonza, mo surtut da dar vinavon mauns libers alla cumissium per saver continuar cun las lavurs. El fa denton era attents tuts presents che la suprastonza sa s'accordar cun la renovaziun totala dalla baselgia mo sut la cundiziun che l'entira caussa resti alla fin da tuttas fins supportabla per la pleiv. Partenent quella caussa surdat el il plaid al cassier.

b)

Nies cassier dalla pleiv signur Simeon Cavegn pren il plaid e presenta ina resumaziun d'intradas ed expensas dils davos 6 onns sco era in plan da finanziaziun schazegiau pils proxims 5 onns. El declara cefra per cefra e manegia ch'en principi seigi el per ina sanaziun aschi lunsch che quella seigi supportabla per la pleiv. Ina renovaziun totala dad

1,7 milliuns francs seigi ord vesta dil cassier sco era da tuts cheu presents ina enorma summa ed era cun quintar da survegnir da tuttas varts donnaziuns e contribuziuns sco presentau dalla cumissiun, las qualas seigien denton ad interim mo sil pupi e buca efectivadas, resti ei in manco da 486'000.00 francs. Nies cassier ei fetg sceptics sur dalla caussa, ha denton presentau tut cefras claras e concretas e priu negin fegl avon bucca. Sia calculaziun, la quala ei ina part integrala da quest protocol, muossa clar e bein, che per saver/vuler realisar quella sanaziun, drova ei aunc entgins mettels finansials dad ina vart ni l'otra. Sur Alexi Manetsch lai saver, che la baselgia da s. Vigeli seigi ina baselgia barocca. La color melna simboliseschi la color dil tschiel e dil parvis. El vegli buca cumandar mo recumandar da dar anavos la color originala. Ei fagessi tut in'otra paretta e bia pli biala. Ei seigi ina schanza unica cun prender naven ils altars. Era la finiastra davos igl altar grond che seigi da gliez temps vegnida cuvretga fussi bellezza d'arver, demai ch'ella seigi drizzada encunter damaun. Il sulegl dalla damaun seigi simbol dalla levada e dessi in effect nundetg en baselgia. Secapescha sa ins mai cuntentar tuts. Pli baul cumandavien ils augsegners tgei e co ch'ei vegni fatg, manegia el. El denton vegli buca cumandar mobein recumandar. Sco finizium manegia el che nus stueien mirar pigl avegnir ed haver curascha malgrad che sesanfleien gest el mument en ina sfendaglia pertuccont cardientscha e baselgia.

Tractanda 5

President Tadeus Giossi arva la discussiun dalla quala ins fa stediamein diever. Denter auter vegn fatg la damonda, schebein ins mondi si cun la taglia da baselgia ni buc. Era san ins buca capir daco ch'ins stoppi sedecider sur dalla caussa gia ussa per survegnir daners dil cantun ni confederaziun. Signur Tarcisi Hendry e signur Indergand stattan a disposiziun ed emprovan da dar risposta sin mintga damonda. Che la baselgia basegna ina sanaziun e schubergiada ei per tuts caussa segira. Metter anavos altars el stan vegl, demontar bauns, metter in niev plantschii e remplazzar finiastras, gliez ei lu in'otra caussa che dat schon da patertgar cunzun cu las finanzas ein scartas? Fuss ei buca la pusseivladad da restrenscher e redimensiunar quei object sedamondan ils biars?

Tractanda 6

President da Vischnaunca, Placi Berther pren il plaid e lai saver, ch'els hagien studegiiau la documentaziun ch'els hagien retschert a caschun dalla davosa seduta ensemen cun la suprastanza dalla pleiv. El fa in compliment alla cumissiun da renovaziun per l'informativa documentaziun, manegia denton che quella tonschi buca per reglar il punct finansial. Era sche la cumissiun seigi spannegiada sin la contribuziun dalla vischnaunca politica, vegli el claramein schar sentir, che la vischnaunca seigi buca obligada da prender part dalla finanziaziun da quei object. Ella seigi mo obligada da sorprendere la mesa-

dad dils cuosts dil clutger e tuchiez sco era dil corridor. La vischnaunca drovi denton aunc empau scларiment e temps e vegni lu proximamein a communicar sia decisium.

Tractanda 7

Suenter viva discussiun fa gerau Emanuel Berther la suandonta proposta per votaziun.

1. Votaziun:

Schebein ils presents parochians ein cuntents da principi da far ina renovaziun ni buc.

2. Votaziun:

Da purtar en ina 2. radunonza duas variantas sco suonda:

1. renovaziun radicala maximala (tut sco previu tenor la cumissiun)
2. renovaziun minimala reducida (mo il necessari, basigneivel)

cun presentar tier omisduas variantas ils cuosts exacts sco era in plan da finanziaziun concret e serius.

La proposta dad Emanuel vegn acceptada unanimamein. President Tadeus Giossi animescha da vegnir alla proxima, impurtonta seduta. El engrazia per l'attenziun e giavischa a tuts in bien retuorn a casa.

Tractanda 8

Sut varia negin che vul s'exprimer, aschia ch'il president dalla pleiv siara la liunga seduta, engrazia per l'attenziun e giavischa a tuts in bien retuorn a casa.

Camischolas, ils 08-04-04

Il president:
Tadeus Giossi

L'actuara:
Daniela Monn-Berther

Protocol dalla radunonza generala dalla pleiv Tujetsch

gliendisdis, ils 14-06-2004 allas 20.15 uras en l'aula dalla casa da scola Sedrun

Tractandas:

1. Elecziun da dus dumbravuschs
2. Protocol dalla radunonza generala dils 2 da zercladur 2003
3. Rapport dil president
4. Rapport dalla presidenta dil Cussegl pastoral
5. Rendaquen, rapport dils revisurs ed approbaziun dil quen 2003
6. Preventiv e fixar pei da taglia per 2004
7. Restauraziun baselgia parochiala s. Vigeli:
 - a) decisiun dalla varianta
 - b) conceder il necessari credit
8. Elecziuns:
 - a) president dalla pleiv
 - b) 4 commembers da suprastonza
 - c) 2 revisurs da quen
 - d) 2 suppleants
 - e) 1 delegau al Corpus catholicum
9. Varia

Presents

29 personas

Perstgisas

Bruno Berther, Rudolf Cavegn e sur Wangler

Nies president dalla pleiv Tadeus Giossi arva la radunonza generala e beneventa cordialmeins tuts cheu presents. El engrazia per mussar interess e giavischa a tuts ina buna e fritgeivla deliberaziun da tut ils fats en nosa pleiv. In special beinvegner admetta el a nies premurau augsegner sur Alexi Manetsch.

Tractanda 1

Elecziun d'in dumbravuschs

Sco dumbravuschs vegn elegiu signur Vigeli Giossi Rueras.

Tractanda 2

Protocol dalla davosa radunonza generala dils 14 da matg 2003

Il protocol dalla davosa radunonza generala che ha giu liug ils 14 da matg 02 ei vegnius approbaus sco publicau el rapport annual senza objecziuns.

Tractanda 3

Rapport dil president

Preziadas parochianas, preziai parochians

Igl onn 2003 vegn segir ad ira en las annalas quei che pertucca l'aura. In unviern cun temperaturas migeivlas e sulegl naven dalla damaun entochen la sera. Periodas liungas da fina bial'aura ein vegnidas interruttas mo da paucs dis da malaura. Il suffel criu, la cufla e las nevasdas ein stai quest unviern veramein en vacanzas e quei perfin la primavera. Ils ins da nus havevan gia tema all'entschatta digl onn che quei unviern laschi lu ora las cornas la primavera. Suenter quellas liungas periodas da fina bial'aura vegni lu era periodas da macort'aura eran ils auters perschuadi. Denton gnanc il meins d'avrel ei staus macorts, bletschs e freids aschia sco nus essan plitost endisai da quei meins. E la stad, co vegn lezza a semussar eran auters en panzieri. Ina bellezza stad ei suandada cun sulegl senza fin. Segiramein ha la plievgia muncau empau. Mo cheu en nossa Val ein ils donns dallas caliras e dalla schitgira stai fetg pigns cumparegliau cun auters loghens. Per in cletg sa negin da nus tschentar en l'aura sco el vul. Fuss quei pusseivel havess il mund negin'aura pli. Quei ch'ei a nus pusseivel ei da rugar tiel bien Diu per aura favoreivla. Avon onns fussen ils cartents da nossa vischnaunca segiramein ira a rugar per plievgia cun far ina processiuin tier ina da nossas capluttas. Oz essan nus buca pli dependents da quei, ei va era senza, ils daners ein avon maun ed en stizun san ins cumprar tut. Gie, ei quei veramein pusseivel da saver cumprar tut, perfin l'aura, gie schizun il parvis? Essan nus veramein buca pli dependents da Diu? Essan nus gia aschi luschi che nus duvrein buca pli EL? Enconuschein nus Diu mo cura che nus essan en miseria. Ni mo lura cura che nus havein da festivar enzatgei, fiastas da nozzas, battens, emprema s. Communiun, Creisma e.a.v. Lura lein nus esser ellas empremas retschas, esser fetg damaneivel, da tgi? Da Diu ni da nusez? Il digren da spirituals fa a biars gronds quitaus. Mo il digren en nossas baselgias fa aunc pli gronds quitaus. Tgei nezegia ei d'haver in plevon che fa dumengia per dumengia messa, sch'el sto far quella per el, il pievel ha buca pli interess e basegns dalla s. messa. Ils affons vulan buca pli survir messa e far quei survetsch a Diu. Mo paucs dad els muossan aunc interess e vegnan susteni da lur geniturs da far quei plascher a nies Suprem.

Pastoraziun pleivs Medel-Mustér-Tujetsch-Cavardiras

Gia dapi in temps collaboreschan las pleivs da Medel-Mustér e Tujetsch en la pastoraziun. Suent'er liungas e diras contractivas han las treis pleivs finalmein anflau ina clav co reglar la pastoraziun e la repartiziun dils cuosts. Strusch ein las contractivas stadas terminadas ha ei dau danovamein ina midada. A sur Alexi Manetsch ei vegniu surdau digl ordinariat episcopal, la pastoraziun dalla caplania da Cavardiras. Quei ha lu giu per consequenza ch'ins ha danovamein stuiu seser ensemen ed encurir ina via ella pastora-ziun sco era per la reglementaziun dils cuosts. Oz essan nus aschi lunsch che nus essan finalmein vegni da reglar quellas caussas. Per la pastoraziun en tuttas pleivs ei sur Alexi Manetsch responsabels. El vegn sustenius da sur Albert Wangler cun 100% d'ina piazza e da sur Ozioma Nwachukwu cun 20%. Plinavon segidan pensiunai e la venerabla claustra cura ch'ei fa basegns. Cunzun tier las fiastas dall'emprema s. communion, creismas, fiastas da baselgia e.a.v. drovan nos spirituals agid. Demai che sur Wangler e sur Ozioma han omisdus buca vuliu surprender ina administraziun d'ina pleiv, stat l'entira admi-nistraziun da tuttas pleivs sut la direcziun da sur Alexi Manetsch. El vegn sustenius en quels fatgs dils secretariats che mintga pleiv ha schaffiu. Era las calustras segidan leu nua ch'ei fa basegns.

Per saver ademplier ina andanta pastoraziun ellas pleivs e reparter egualmein ils cuosts havein nus era stuiu reglementar las s. messas en mintga vischnaunca.

Repartiziun dils survetschs divins

Medel	3 survetschs divins ad jamna
Mustér	6 survetschs divins ad jamna
Tujetsch	6 survetschs divins ad jamna
Cavardiras	1 survetsch divin ad jamna

Repartiziun dallas pagas, cuosts socials, spesas dils augsegners:

Tenor calculaziun muntan las pagas, segiradas, spesas dils 3 plevons annualmein ro-dund 232'500.00 francs netto. La caplania da Cavardiras paga suenter las s. messas che vegnan fatgas, quei che munta annualmein rodund 8'000.00 francs. Aschia che resta la summa da 224'500.00 francs da reparter sin las 3 pleivs.

Medel	20% dils cuosts, annualmein frs. 44'900.00
Muster	40% dils cuosts, annualmein frs. 89'800.00
Tujetsch	40% dils cuosts, annualmein frs. 89'800.00

Ils plevons pensiunai che mintga pleiv drova vegnan indemnissai directamein dalla pleiv pertuccada, e silsunter reparti ad 1/3 per in.

Ils incassos, las pagas, tuts rendaquens vegnan fatgs da nies cassier Simeon Cavegn. Per quella lavur vegn incassau da mintga pleiv tenor temps impundiu.

Finalmein quintein nus da haver anflau la via definitiva ella pastoraziun ed ella reparti-ziun dils cuosts denter las pleivs cumpigliadas.

Renovaziun casa pervenda Sedrun

Alla radunonza extraordinaria dalla pleiv Tujetsch dils 24 da fevrer 2003 han ils commem-bers da nossa cuminonza decidiu da renovar e sanar la casa pervenda a Cadruvi. Dapi l'erecziun da quei object ei vegniu fatg pli u meins nuot vid quella casa, aschia ch'ina sanaziun ei stada fetg urgenta. Duront igl onn 2003 ein las lavurs previdas exequidas e cun igl atun han quellas saviu vegnir terminadas. Enqual sorpresa ha ei bein dau e la supraston-za ha stuiu decider enteifer cuort termin per ina caussa ni l'otra. Per exempel eran las lingias d'aua per part stuppadas, quei pervia che talas eran dapi in temps buca stadas en funcziun. Tier il scaldament eran quellas medemamein interruttas. Il tetg havevan ins en mira da buca stuer midar, denton ha ei semussau per cur ch'ins ha vuliu midar las canals che las plattas eran per part fetg donnegiadas. Suenter ina uatga sil plaz ha la suprastonza decidiu da medemamein era sanar il tetg dalla casa. Quei gest era ord il motiv ch'ins ha saviu surdar quellas lavurs per in prezi zun favoreivel. Dil palancau ch'ins ha duvrau per colurar las fassadas dalla casa ha ins medemamein saviu far diever per sanar il tetg.

Da far il tetg in per onns pli tard, havess in niev palancau stuiu vegnir construius, quei che havess custau enzacons melli francs. Ultra da quei ei vegniu fatg ina sala pintga per sedutas, in biro per il secretariat e midau giu l'intrada. Per saver far diever da quellas localitads ston ins buc pli entrar en la habitaziun digl augsegner. El plaunterren ei me-demamein vegniu fatg pintgas midadas cun serrar giu igl access. La gruppa da termagliar ha survegniu empau dapli plaz per deponer sia rauba. Plinavon ein tuts cilenders dils eschs principals vegni midai ora. Cheutras havein nus era saviu reglar tgi che sa far diever da tgei local.

Resumaziun dils cuosts

Cun quellas midadas ein ils cuosts era vegni empau pli gronds che previu. La sanaziun e renovaziun dalla casa pervenda ha caschunau cuosts totals da frs. 183'895.50. Las

lavurs internas han caschunau cuosts da frs. 134'728.65. Previu eran cuosts tenor las offertas da frs. 130'000.00. Aschia che seresulta in alzament da cuosts per las lavurs internas da frs. 4'728.65. Tier las lavurs externas er'ei previu cuosts da frs. 35'000.00. Caschunau han quellas lavurs denton cuosts da frs. 49'166.85. Pia ina differenza da surpli da frs. 14'166.85. Il surpli cuosts per la renovaziun muntan a frs. 18'895.50. Quei surpli d'expensas ei seresultaus ord las lavurs supplementaras sura numnadas, principalmein la nova cuvrida dil tetg.

Sanaziun dil bogn, casa pervenda Rueras

La casa pervenda a Rueras vegn dapi 15 onns buca pli duvrada sco casa pervenda. Ella vegn schada a tscheins dapi igl onn 1989, numnadamein alla famiglia Vincens. Gia daditg ei buca pli vegniu fatg enzatgei en quei baghetg. Il bogn e la cuschina han ussa veramein da basegns da far migliur. Ord quella raschun ha la suprastonza dalla pleiv decidu da sanar onn per onn quella casa. Per igl onn 2003 havein nus decidu da sanar il bogn. E per igl onn 2004 ei previu da sanar la cuschina. Per las lavurs dil bogn ei vegniu calculau cun cuosts da frs. 21'345.45. Custau ha quella remedia la summa totala da frs. 21'048.85. In pign respargn da rodund frs. 300.00 enviers il budgetau.

Restauraziun interna dalla baselgia parochiala s. Vigeli

La baselgia s. Vigeli da 1691 ei vegnida restaurada internamein las davosas gadas ils onns 1899, lu 1934/35 e la davosa ils anno 1973. Grondas midadas (lavurs) internas ein vegnidadas fatgas entras la restauraziun da 1934/35. Lura ein era ils altars vegni restaurai e quei entras la firma Stöckli, che ha en general colurau da niev ils altars. Cun la davosa restauraziun interna ei vegniu seconcentau plitost sin las miraglias, ils bauns, plantschius ed illuminaziun. Ina egliada en baselgia muossa la necessitad da far ussa ina restauraziun. Ei para pia che mintga generaziun vegn inagada vidlunder da restaurar la baselgia s. Vigeli. Per saver entscheiver cun las preparativas per ina restauraziun ha la suprastonza da pleiv Tujetsch elegiu igl atun 2002 ina cumissiun. Quella secumpona da Tarcisi Hendry, ch'ei vegnius elegius sco president e dils commembers da suprastonza dunna Ursulina Cavegn e Mudest Venzin. Ladinamein ha quella cumissiun entschiet cun las lavurs preparatoricas tenor l'incarica dalla suprastonza da pleiv da preveder ina restauraziun radicala interna. Quei vul dir da preveder buca mo il pli necessari, mobein era caussas giavischadas che stuessen buca vegnir restauradas per tut prezi. Per saver far tut las preparativas necessarias ha la cumissiun duvrau in architect. Sin recumandaziun da perunas dil fatg ha la suprastonza lu elegiu igl architect Bruno Indergand da Cumbel che vegn assistius digl architect indigen Piotr Halon. Nossa baselgia ei il liug da sentupada

religiusa per nossa cuminonza cristiana, per ils survetschs divins, per battens, sepulturas, devoziuns, fiastas e concerts sacralis. Ella ei denton era in object cultural da tut special gener che nos perdavons han tgirau e manteniu. Igl ei noss' obligaziun da suandar nos antenats.

Prau Dulezi

La parcella terren dil Dulezi ei en possess dalla fundaziun s. Vigeli. Tuttas fatschentas dalla fundaziun vegnan empalladas dalla pleiv da Tujetsch. Entochen oz ha la vischnaunca affittau en dretg da baghegiar entginas parts da quei terren. Per mintgina da quellas parts ei vegniu fatg in contract ed entochen oz existan 3 contracts d'affittaziun en dretg da baghegiar. La vischnaunca ha avon entgin temps fatg diever d'ulteriu terren (novs parcadis sut tgèsa communal) senza dumandar la pleiv. Sin fundament da quei ha la supprastonza da pleiv inoltrau protesta encunter la damonda da baghegiar dalla vischnaunca. Pér suenter quella proposta ha la vischnaunca priu si contact cun la pleiv per ina affittaziun ni cumpra da quei terren. Las contractivas per quella fatschenta han aunc buca saviu vegnir serradas giu. La supprastonza dalla pleiv ei dil meini che la vischnaunca stoppi affittar en dretg da baghegiar gl'entir territori ella zona per baghetgs publics ed ella zona per indrezs publics. Quei vul dir era las scarpas, spundas ed il terren che vegn buca duvraus. Entochen oz paga la vischnaunca mo per il terren surbaghegius. Per gl'entir territori duei lu vegnir fatg mo in contract d'affittaziun. Aschigleiti che quellas contractivas ein terminadas vegn il contract presentaus als commembers sin la radunonza generala.

Il Segner ha semnau - il Segner ha raccoltau

Gronda raccolta ha il Segner fatg uonn en nossa cuminonza. El ha menau a casa tiel bab 23 commembers, 14 femnas e 9 umens. In pulit diember sur la media. Dieus dispona sur da nus sco el vul, el arva denton la porta dil parvis per schar entrar tut tgi che vul. Nos cars defuncts gaudan ussa la beadadad en tschiel e la splendur da Cristus. Lein buca esser trests che nus havein piars els, mobein selegrar che nus havein astgau ver els. Els han enrihiu nossa cuminonza ed ussa ein els mo ira ordavon a nus. Per tut quella rihezia ch'els han reglau a nus duront lur viver cheu sin tiara lein nus engraziar. Mintgin dad els ha schau anavos in u l'auter fastitg, ils quals nus lein mantener en buna engrazievla regurdientscha.

Nossa cuminonza cristiana ha uonn astgau beneventar 12 novs commembers. En nossas baselgias e capluttas han els astgau retscheiver il s.Sacrament dil batten. Cun plascher

beneventein nus Vos pignets en nossas retschas ed engraziein a Vos geniturs ch'els han possibilitau a Vos da retscheiver quei sacrament. Bugen giavischein a Vos tuts in bien prosperar en la vegna dil Segner. Ulteriur han aunc 11 affonets d'ordvart retschiert en nossa pleiv il s. Sacrament dil batten. Era ad els tut bien prosperar en la cuminonza cristiana. Nossas baselgias han dau albiert per l'enzinaziun da 4 lètgs, 2 indigenas e 2 jastras. Als spusai gratulein nus e giavischein bia bien en lur veta matrimoniala.

Engraziament

In grond engraziament admettein nus a sur Alexi Manetsch per tut sia buna lavur ed engaschi ella pastoraziun. Sin sias schuialas schai in grond buordi cun bia quitaus e fastedis. Grazia a siu perschuadiu engaschi ha nossa pleiv aunc mintga dumengia silmeins ina s. messa. Sincer Dieus paghi a Vos sur Alexi per tut il prestau e per tut quei che Vos presteis en nossa pleiv. Senza Vos fuss la pleiv da Tujetsch paupra, gie fetg paupra.

Ulteriuramein engraziein nus era als gidonters sur Albert Wangler, sur Ozioma Nwachukwu ed a tuts spirituals che segidan per la lavur e quitaus ella pastoraziun.

Plinavon engraziein nus als spirituals ella tgèsa s. Vigeli, sur Placi Huonder, sur Christian Monn e sur Giusep Berther per tut lur buns survetschs.

Senza igl agid da biars gidonters fuss il pensum d'ina pleiv strusch da dumignar. Per quei engraziein nus a Vos tuts che contribuiss bia lavur per in bien beinstar en nossa cuminonza. In cordial engraziament lessen nus cunzun admetter:

allas calustras e lur gidonters
allas dunnas ch'instrueschan ductrina
al Cussegl pastoral
als chors baselgia, al chor mischedau ed alla societad da musica
als dirigents ed organists (as)
all'uniun da dunnas e da giuventetgna
als ugaus da baselgias e capluttas
als ministrants (as)

Vegli il buntadeivel Diu regalar a Vos la pagaglia.

Il Tutpussent accumpogni e protegi nus tuts sin la via che meina a casa tier il Bab en tschiel.

Tractanda 4 (mess a protocol sco edius dalla presidenta)

Rapport annual dil Cussegl pastoral Tujetsch 2003

Preziadas conparochianas e preziai conparochians

Nies pensum ei fixaus els statuts, denton lessel tuttina dar plaid e fatg da nossa lavur enteifer il Cussegl pastoral en favur dalla pleiv.

Demissiun ed elecziuns

Suenter dus onns d'uffeci ha ei dau neginas midadas enteifer nies cussegl. Probabel dat ei l'entschatta digl onn 2004 ina midada culla representanta dalla SIGA, denton ei quei aunc buca sclariu.

Sogns Retgs

Nus finin ed entschevein igl onn mintgamai cun las preparaziuns da Buania. Il mussar la canzun dils s. Retgs surpren il scolast dalla sisavla classa. Scolast Ciril Monn ha dau tutta breigia ed igl ei gartegiau oreifer. Nossa lavur ei semtgar vestgadira, crunas e steilas. Per la sminca astgein clamar la versada Astrid Monn. Ils transports els uclauns han ils geniturs dils scolars surpriu. Quei survetsch ha gidau nus ord las stretgas. La collecta ei ida en favur dils aultplidaders dalla baselgia a Sedrun. A tuts gidonters in grond engraziament per la lavur prestada. Sche nus lein mantener quei bi usit, essan adina puspei visai sigl agid da Vus, preziasas parochianas e preziai parochians. Las steilas dils S. Retgs ston vegnir remplazzadas. Nus havein encuretg sch'ins savess cumprar da quellas. Mo quei ei buca stau il cass, aschia havein dau l'incarica a Norbert Loretz da fabricar novas sigl onn vegnent. Las steilas duessen esser in tec pli pintgas, ch'ellas mondien da transportar e cunzun ston ellas esser pli levas.

Di da suppa

La fin mars han las mummas dil survetsch divin preeucaristic cun sur Ozioma preparau la s. messa en sala da scola. Igl ei stau in survetsch divin tut special bi. Ei fa adina surstar tgei bunas ideas e tgei gronda lavur che vegn prestada per nossa pleiv. Per il bi e dign cant ha il chor baselgia da Rueras procurau. Suenter messa ei la renomada suppa dil Nazi Schmid vegnida survida. Las pettas per il dessert ein vegnidas offeridas da bia dunnas da nossa pleiv. Per la semplia denton buna spisa lessel engraziar a tuts donaturs grondamein. La collecta da quei di ei ida en favur dil project da sur Ozioma en Nigeria. A tut tgi che ha susteniu quella buna causa engraziel fetg.

Dumengia alva

Per la fiasta da dumengia alva havein restauriu il Babin. El haveva ner basegns. Per quella lavur havein astgau retscheiver agid da dus versai conparochians. Per il niev ornament digl artg da fluras ha la Barla Monego procurau ed il «macke-up» ha il Mudest Venzin frestgentau. Quella lavur ha custau a nus nuot auter ch'in engrazia.

Aperitivs

El decuors dalla primavera ha la pleiv offeriu igl aperitiv da s. Vigeli a Sedrun ed a Rueras in aperitiv per la fiasta dil Cor de Jesus.

Fiasta da Sontgilcrest

Il survetsch divin da Sontgilcrest ei vegnius celebraus da sur Wangler el liber sper la casa s. Vigeli. Il chor baselgia da Sedrun ha embelliu il survetsch divin cun siu bi cant. Suenter messa ha la gruppa dils menaders dil camp da ministrants envidau tier l'usitada grillada. Igl ei stau bien, engraziel fetg.

Conclusiun

In cordial engraziament admettel a nos preziai spirituals sur Alexi, sur Ozioma e sur Wangler per lur grond engaschi en favur da noss'entira pleiv. Alla gruppa liturgica ed allas mummas dil survetsch divin preeucaristic medemamein in sincer Dieus paghi. Bugen engraziel era alla suprastonza da pleiv cun siu president Tadeus Giossi. In merittau engraziament a nossas premuradas calustras, als chors e lur dirigents, als organists, a tuttas uniuns e semplamein a mintgin che segida per il beinstar da nossa pleiv. In engraziament s'auda era a mia consuprastonta sco era a tuttas commembras e commembers che segidan cun plaid e fatg.

Tractanda 5

Rendaquen, rapport dils revisurs ed approbazium dil quen 2003

Il quen vegn presentaus clar e capeivel da nies cassier Simeon Cavegn.

Entradas	frs.	362'732.46
Expensas	frs.	388'627.05
Fatg anavos	frs.	25'894.59

La revisiun dil quen 2003 ei vegnida fatga entras ils 2 revisurs en preschientscha dil cassier sonda Pastgas, ils 10 d'avrel 2004. Tier lur conrtolla han els inspectau quen e bilanza sco era ils quens dallas baselgias e capluttas. Sco usitau ei il quen menaus conform alla contabilitad moderna schuber e bein. Tut ils mussaments ein avon maun e corrispundan allas cudischaziuns. Sin tut lur damondas ha il cassier saviu porscher il sclariment giavischau.

Sin fundament da lur controlla proponan ils revisurs alla radunonza generala:

- a) dad approbar il quen e bilanza 2003 dalla Pleiv da Tujetsch
- b) da dar scarica a cassier e tuts funcziunaris dalla suprastonza
- c) dad admetter al cassier Simeon Cavegn in cordial Dieus paghi per siu engaschi

Il quen e bilanza 2003 vegnan approvai unanimamein.

Tractanda 6

Preventiv e fixar il pei da taglia per 2004

Il preventiv vegn presentaus entras nies cassier Simeon Cavegn ed approbaus sco mess avon. La proposta dalla suprastonza da schar il pei da taglia sin 10% dalla taglia cantunala sco da cheu vegn sustenida da tuts presents unanimamein.

Tractanda 7

Restauraziun baselgia parochiala s. Vigeli

Il president dalla cumissiun Tarcisi Hendry declara cun agid tecnic pass per pass lur ideas co la cumissiun metta avon quella renovaziun. Era architect signur Indergand surpren il plaid per dar in detagliau ed entelgeivel sclariment sur dalla renovaziun baselgia principala sco els vesessen tala. El engrazia a Tarcisi Hendry per sia informativa, interessanta e bein preparada lavur. Signur Indergand declara detagliadamein co el vesa quella sanaziun, entschiet cun ils mirs che hagian pituu considerablamein dalla humidatad sco era dil scaldament, las installaziuns electricas e buca sco davos la pli interessanta part dalla renovaziun, ils altars ch'ei nuncapeivlamein tier la davosa renovaziun digl onn 1934 vegni cuvretgs cun color cotschna. Quella restauraziun ei lu era la pli cara part dalla restauraziun interna, demai ch'ins vul metter ils altars el stan d'origin ch'ei da ses onns vegni baghegiai en stil baroc da Johannes Ritz anno 1702. Igl architect presenta a tuts il plan da finanziaziun cun ina summa dad 1.697 milliuns francs. Ei seigi denton calculau tut sigl ault. Cun quell'interessanta informaziun surdat Tarcisi Hendry

il plaid a Tadeus Giossi cun denton supplicar il pievel cheu present d'haver curascha e fidonza en caussa.

a) Decisiun dalla varianta

Cheu la presentaziun dils cuosts tenor la decisiun da signur Indergand ensemen cun la cumissiun da baghegiar.

Varianta 1 cuosts totals	frs. 1'397'940.00
Varianta 2 cuosts totals	frs. 1'143'740.00
Varianta 3 cuosts totals	frs. 823'740.00

Varianta 1 cumpeglia ina restauraziun optimala. Tut igl actualmeins necessari vegn risguardau en quella sanaziun. Ils altars vegnan agl origin da Ritz. Varianta 2 e 3 ein identicas cun l'excepciun dalla sanaziun dils altars. En varianta 1 e 2 vegnan els restaurai egl original ed en varianta 3 mo renovai, pia oravontut schubergiai. Tuttas reducziuns dalla varianta optimala muntan concessiuns per part era cun consequenzas. Baul ni tard sto era il buca executiu vegnir sanau.

Suenter liunga discussiun nua che president ed architect san dar completameins plaid e fatg vegn votau giu cun 24 encunter 5 vuschs per la varianta optimala. Pia varianta 1 cun la summa da frs. 1'397'940.00

Quella varianta risguarda pia tuts basegns actualmeins necessariis cun restaurar ils altars anavos en lur stan original. Plinavon vegn la part davos dalla baselgia adattada al maletg baroc. Ils altars barocs vegnan lu a sepresentar en in tun pli clar ella fuorma dil temps da construcziun.

b) Conceder il necessari credit

Finanziaziun

Cuosts totals	1'397'940.00
Contribuziuns previdas:	
Corpus catholicum Grischun	
Cantun	199'000.00
Confederaziun	199'000.00
Baselgias svizras	100'000.00
Fundaziuns/instituziuns	200'000.00

Emprest bancar	220'000.00
Contribuziuns	
Interpresas/segiradas	30'000.00
Contribuziun vischnaunca	
Cumpart vischnaunca/tuchiez	11'120.00
Collecta cun prospect	50'000.00
Deivet restont	388'820.00

Tiel Corpus catholicum ei ina damonda per ina contribuziun inoltrada. Schebein nus savein retscheiver agid finanziel dependa dil pei da taglia. Cun in scriver dils 4 da matg 2004 communichescha la regenza cantunala ina contribuziun maximala da 236'468.00 francs. Tier la Confederaziun ei la damonda medemamein inoltrada. En general vegn la Confederaziun a sustener cun la medema summa sco il cantun; mai ei ina damonda sustenida dil cantun vegnida renviada. Dalla instituziun «baselgias svizras» sco era da diversas instituziuns e funcziuns naziunalas spitgein nus generus agid e sustegn finanziel. Era cheu vegn votau giu unanimamein cun in gie. Dumbravuschs Vigeli Giossi engrazia persuerter.

Eleccziuns

Actuara Daniela Monn-Berther remetta suenter 9 onns siu post en favur dalla suprastonza dalla pleiv. (Ils emprens 3 onns sco assessura e 6 onns sco actuara). Era Mudest Venzin remetta siu post sco commember dalla suprastonza da pleiv. (3 onns actuar, 6 onns vice-president e responsabels per fatgs dil baghetg).

a) President dalla pleiv

Suenter saver perschuader nies anteriur president Tadeus Giossi sedecida el aunc inaga da presidiar il menaschi dalla pleiv per ina perioda da treis onns, denton cul giavisch da suenter buca pli vegnir reelegius. Tadeus Giossi vegn reelegius unanimamein.

b) Sco commembers da suprastonza vegnan elegi ni reelegi:

Simeon Cavegn
 Ursulina Cavegn
 Rita Hitz-Schmid (niev)
 Jgnazi Monn (niev)

c) 2 revisurs da quen

Hubert Venzin (niev)

Linus Vincenss (niev)

c) 2 suppleants

Victoria Berther (niev)

Mudest Venzin (niev)

e) 1 delegau al Corpus catolisum

Entzatgi dalla suprastonza (fan giu denter els)

Tuts cheusura numnai vegnan elegi unanimamein. Gratulaziun

Varia

Sut varia para negin che vul far diever. Aschia engrazia il president dalla pleiv Tadeus Giossi per la beinvulientscha da vegnir, pigl interess pils fatgs dalla pleiv e giavischa ina buna collaboraziun culla nova suprastonza dalla pleiv. El siara la seduta allas 22.45 uras cun giavischar a tuts in bien retuorn a casa.

Camischolas, ils 8-07-2004

Il president:
Tadeus Giossi

L'actuara:
Daniela Monn-Berther

Protocol

Radunonza extraordinaria mardis, ils 21-12-2004 ell'aula da scola Sedrun

Presents:

President Tadeus Giossi, Uschi Cavegn, Rita Hitz, Simeon Cavegn, Jgnazi Monn sur Alexi Manetsch, Tarcisi Hendry.

Perstgisas:

Neginas

Tractandas:

1. Beinvegni
2. Informaziun 800 onns baselgia S. Vigeli
3. Presentaziun dil program da fiasta
4. Approbaziun;
 - a) program da fiasta
 - b) conceder il credit necessari
5. Varia

Tractanda 1

Beinvegni

Il president arva punctualmein la radunonza extraordinaria e fa in beinvegni a tuts presents, specialmein a sur Alexi Manetsch e signur Tarcisi Hendry. Presentas ein 27 persuonas e la suprastonza. Perstgisau ha president communal Placi Berther.

Tractanda 2

Informaziun 800 onns baselgia s. Vigeli

Informaziun 800 onns baselgia s. Vigeli. President Tadeus Giossi orientescha sur da nossa festividat e sur dallas finanzas che nus duvrassien per menar atras quellas fiastas egl onn 2005. Cunquei che la summa munta ca. frs. 60'000.00 e la suprastonza sa decider senza mo sur da frs. 15'000.00 essan serimnai cheu per dumandar Vus per sustegn en nies concept. Nus havein era dumandau a scret per sustegn tier la vischnaunca da Tujetsch e survegnessien ina contribuziun da frs. 15'000.00 aschia ch'ei restass aunc per nus da dumandar il pievel da conceder in credit da frs. 45'000.00.

Tractanda 3

Presentaziun dil program da fiasta

Signur Tarcisi Hendry orientescha ils convischins che la baselgia da Sedrun seigi menziunada per l'emprema ga 1205 cun ina notizia dils 26-06-1205. El ha fatg retschercas e survegn la risposta che quei seigi fundau historic. Pia festivein nus uonn 800 onns baselgia e havein studegiau tgei far? Nus lein reparter quellas 11 occurrenzas sigl entir onn e far per pign e grond enzatgei. Tarcisi presenta la documentaziun e fa attents ch'ei vegni era orientau en in ritmus en la Tuatschina sur dil previu.

Discussiun

Ils meinis van en bia direcziuns. Dubis sur da nossa festivitad, quei seigi buc ina fiasta da baselgia mobein ina fiasta populara. Far fiasta a Sedrun ed aunc a Mustér seigi brava-mein tubac. Ins duessi era risguardar ils luvrers dalla NEAT e schar curdar la fiasta a Mustér. Il program seigi surcargaus. La fiasta a Mustér seigi buca necessaria.

Positiv surstai da nies program dat ei era. Gratulaziun e sustegn astgein prender encunter dad auters vischins ed in dat pli bugen a nus ils daners, enstagl per far giu la puorla en baselgia duront la renovaziun. Finanziaziun dalla renovaziun baselgia e dalla festivitad ein buc il medem. Entras la taglia da fontauna havein dapli intradas. Per oz e damaun stuein era buc alzar il pei da taglia. Sur Alexi pren il plaid. La baselgia s. Vigeli ei malsauna, ella drova ina renovaziun. La baselgia sco cuminonza ei malsauna. Ella drova nova veta, mo lu vesa el in avegnir. Quei ei era in act d'engraziament a nos antenats. Tut quei ch'ins fa oz tegn buc aschi ditg. Nus mein encunter in individualissem, mintgin mira mo per sesez. Il carstgaun vegn malsaus. Igl onn da giubileum ei in onn per sentupar. Sur Alexi studegia gia dapi in temps vid ina sentupada sco havein previu la fiasta dil s. Rusari. Entgins vischins han viu en il senn dalla festivitad. Ei vegn aunc orientau che la baselgia seigi per ca. 1 onn serrada. Ella proxima Tuatschina vegn publicau il program da messas. Per la fiasta dil s. Rusari stuein far messa en claustra, nua che ca. 600 personas han plaz e sunter la processiuon en la halla plurivalenta. Per ils luvrers dalla NEAT savess ins forse far in aperitiv il di dallas portas aviartas. Ins sto far giu quei cul cader davontier.

Tractanda 4

Approbazium

a) Program da fiasta

Il program da fiasta vegn approbaus, cun prender en ina occurrenza per ils luvrers dalla NEAT, 23 gie encunter 3 na.

b) Conceder il credit necessari

Proposta reducir la summa per frs. 10'000.00 3 gie encunter 24 na.

Nus essan perschua di ch' ils frs. 45'000.00 schaien el budget. Votaziun per conceder il credit, il pli dils vischins ein per il credit.

Tractanda 5

Varia

In giavisch ei da buca far radunonzas in di ch'ina uniun ha enzatgei. Bruno Berther spera che la pleiv sustegni generusamein il camp da ministrants, cun quei ch'ei stoppien forsa schar curdar la grillada da Sontgilcrest. Il president engrazia a Tarcisi per siu engaschi e siara la radunonza allas 21.45 uras. El giavischa a tuts bialas fiastas da Nadal e Daniev ed in bien retuorn a casa.

Rueras, ils 20-02-2005

Il president: Tadeus Giossi

L'actua: Rita Hitz-Schmid

Rapport dalla suprastonza dalla pleiv Tujetsch per igl onn 2004

Preziadas parochianas, preziai parochians

Igl onn vargau ei staus per la suprastonza da pleiv in onn da preparativas. Dad ina vart tuttas preparativas per la renovaziun dalla baselgia parochiala s. Vigeli e lu era las preparativas per la fiasta da giubileum 800 onns baselgia s. Vigeli. Per la renovaziun e restauraziun ha la cumissiu preparatorica fatg la gronda lavur e preparau per ch'ei sappi vegnir entschiet cun l'entschatta digl onn 2005 cun las lavurs da renovaziun. Dalla cumissiu essan nus vegni informai da temps en temps e leu nua ch'ei ha duvrau ha la suprastonza priu las decisiuns necessarias. Tut quei ch'ei stau pusseivel havein nus denton delegau alla cumissiu. Aschia ha quella saviu luvrar speditiv ed independent.

Renovaziun baselgia s. Vigeli

Il 12 da schaner 2004 ha la suprastonza da pleiv ensemen cun la cumissiu giu ina seduta cun la suprastonza communal. Cheu havein nus presentau il project da sanaziun dalla baselgia parochiala. Nus havein sespruau da dar investa el previu, cun presentar ils cuosts approximativs ed era in plan da finanziaziun. Medemamein ei vegniu relatau sur dallas davosas restauraziuns pli grondas e la muntada culturhistorica dalla baselgia per nossa val. Cun il scriver dils 21 da schaner 2004 communicescha la suprastonza communal ch'ella seigi, en sia seduta, sefatschentada da principi cul project presentau.



Baselgia s. Vigeli

Muort la grondezia dil previu e la vasta documentaziun vegni la suprastonza ad examinar differenziadamein avon che saver prender posiziun sin nosa damonda davart in sustegn financial per la restauraziun previda dalla baselgia da s. Vigeli. Per quellas preparativas basegni ei denton empau dapli temps.

La suprastonza da pleiv ha ils 29 da mars 2004 envidau ad ina sera d'informaziun e discussiun ella baselgia da s. Vigeli. In tschuppel interessai han priu part a quella sera d'informaziun. Cheu ei vegniu informau detagliadamein sur dalla necessitad d'ina renovaziun dil sanctuari s. Vigeli. La miraglia ei nera e per part da gronda humiditad. Egl arviul ei serimnau bia miarda, quei per la gronda part entras il scaldament. Ils maletgs ein stgirs e macorts, las colurs fustgas e senza veta. Plinavon ei vegniu orientau sur dallas davosas renovaziuns, nua ch'igl ei vegniu per part fatg grondas ed impurtontas midadas el sanctuari. Buca tuttas ein stadas gartegiadas ed ins sto tschentar la damonda daco e pertgei aschia. Per exempel la serrada dalla finiastra encunter ost, la colur cotschena dils altars eav. Dar risposta sin quellas damondas negin che sa pli. La tgira da monuments e la savida en quels graus eran da gliez temps buca da gronda impurtonza. Aschia ei igl intent dalla baselgia vegnius adattaus pli baul senza prender pli grond risguard sin ils aspects stilistics.




Altar s. Rusari

Il 5 d'avrel 2004 ha giu liug la radunonza extraordinaria per prender la decisiun per la realisaziun dalla renovaziun dalla baselgia s. Vigeli. In grond diember ha priu part a quella radunonza nua ch'igl ei danovamein vegniu presentau il project da renovaziun. La discussiun ha mussau ch'il pievel vesa la necessitad da far empau remadura, denton la restauraziun dils altars el stan d'origin ei buca propi capeivla. Mettan ins anavos ils altars el stan d'origin, vegn ina color plitost sil mellen a dominar. Quella color simbolisescha il tschiel ed il parvis e dat tut in'otra tempra a nossa baselgia. Cun aunc arver la finiastra davos igl altar grond, ch'ei drizzada encunter damaun, dat il sulegl in effect tut special en baselgia. Il sulegl dalla damaun ei il simbol dalla levada da Cristus. Ils cuosts per quella renovaziun ed il deivet restont ein ualti aults e dattan da studegiar e da ponderar. Prender en mira ina eventuala redimensiun digl entir project, fuss ina varianta da cumpromiss. La radunonza decida la finfinala da purtar en in'ulteriura radunonza variantes redimensiunadas.

Alla radunonza generala dils 14 da zercladur 2004 porta la suprastonza dalla pleiv danovamein la tractanda restauraziun e renovaziun baselgia s. Vigeli. Cun ina documentaziun dalla cumissiun da baghegiar vegn orientau danovamein la necessitad ed il bassegn d'ina migliur vid la baselgia parochiala.

Suandontas mesiras ein planisadas:

- Suenter ils mirs vegn fresiau ora ina fessa d'ariaziun che vegn emplenida cun in letg da crappa.
- Las miraglias donnegiadas, ed oravontut l'isolaziun da corc vegn allontanada e remplazzada cun maulta da caltschina.
- Las finiastras da metal vegnan remplazzadas cun talas da rom da lenn. Plinavon vegn la finiastra ella nav danovamein aviarta.
- Las installaziuns electricas vegnan remplazzadas totalmein, naturalmein era il scaldament, ils aultplidaders ed in niev indrez per impedi d'udida.
- Il plantschiu da ruver vegn remplazzaus cun in da stgein ed ils bauns vegnan bugadai.
- Tuttas preits ed igl arviul cun struccaturas vegnan schubergiadas da schetg e silsuentar cuvretgas cun ina color da caltschina cun poras aviartas.
- Ils tschun altars vegnan schubergiai e conservai. Ils altars barocs vegnan restaurai al stan original.
- L'entira part davos, lautga cun plantschiu sutsi e petgas, vegnan adattadas al maletg baroc dalla baselgia. Era l'orgla retscheiva ina color adattada al stil baroc.
- L'automatisaziun da tucrar e l'ura baselgia vegnan suttamessas ad ina renovaziun.



Maletg via dalla crusch

Il cuosts totals muntan per quellas mesiras da renovaziun e restauraziun frs. 1'397'940.00, quei che fuss era la varianta optimala. La varianta 2 prevedess da reducir ils cuosts per rodund frs. 250'000.00 cun strihar il remplazzament dallas finiastras, il crap natural, il plantschiu e redimensionar il sistem da scaldament. Ella varianta 3 ei previu ultra da quella reducziun da mo schubergiar ils altars enstagl da tschaffar els all'originaliad. Cun quella varianta custass la restauraziun aunc rodund 823'000.00 francs. Tuttas reducziuns dalla varianta optimala muntan denton concessiuns per part era cun consequenzas. Baul ni tard sto era il buca executiu vegnir sanau.



Lavur agl arviul

La cumissiun ensemen cun la suprastanza ei era sefatschentada cun la finanziaziun. Tier la varianta optimala resta ei aunc in deivet, sunter haver risguardau las contribuziuns ch'ei entochen ussa stadas d'eruir, da rodund frs. 597'000.00. Tier varianta 2 sesmi-nuescha il deivet per rodund 100'000.00 francs e tier varianta 3 per circa 50'000.00 francs. Tier tuttas treis variantas sforza il deivet restont d'anflar ulteriuras entradas. Buca il davos ei da preveder la vendita d'ina casa pervenda.

La baselgia parochiala da s. Vigeli ei la pli gronda baselgia dil baroc ault dil Cantun Grischun, mo la baselgia dalla claustra da Mustér ei pli gronda. Il pli custeivel dalla baselgia ein ils altars cun las decoraziuns ed entagls multifars, sias statuas e ses ornaments. Las ovras da Gion e Jodok Ritz ein objects extraordinars custeivels e precius. La pictura originala ei semantenida fetg bein sut la cuvrida dils anno 1934/35. Ils altars san vegnir restaurai e puspei presentai el stan original. La cumissiun e la suprastanza da pleiv proponan la restauraziun e renovaziun optimala. Quella varianta risguarda tuts basegns actualmeins necessaris e restaurescha ils altars anavos en siu stan original, pli-navon vegn la part davos dalla baselgia adattada al maletg baroc.



Altar scuvretg dil s. Rusari


800 onns baselgia s. Vigeli

Igl onn 2005 sa la baselgia da s. Vigeli festivar il giubileum da 800 onns dapi l'emprema menziun. Era cheu ha ei duvrau preparativas ed organisaziun per saver festivar igl onn giubilar. La suprastonza ensemen cun igl archivar Tarcisi Hendry han elaborau in program da fiasta. Alla radunonza extraordinaria dils 21 da december 2005 havein nus presentau a Vus il program da giubileum. Quel preveda differentas occurrenzas per il pievel duront igl onn ora. Il scribent Norbert Berther, Cuera/Sedrun, publichescha regularmein ella Tuatschina davart la veta sacrala a s. Vigeli. Plinavon ei previu suenter la restauraziun da crear in guid per la baselgia parochiala sco era prender en vesta ina nova ediziun «Baselgias e capluttas da Tujetsch» cun actualisar.

Las occurrenzas previstas ein:

1. Da Daniev 2005, avertura digl onn da giubileum, plaid d'avertura en baselgia cun la presentaziun dil program. Sitg da Daniev e repartiziun dil program.
2. Ils 20 d'avrel 2005 referat cun avat Daniel Schönbächler, Mustér cul tema «Tgei ei oz spiritualitad».
3. Restauraziun dalla baselgia - di dallas portas aviartas cun explicaziuns dils responsabels.
4. Fiasta da s. Vigeli, patrun baselgia, ils 26 da zercladur 2005. Messa festiva en sala da gimnastica cun gentar da cuminonza per tuts parochians, offerius dalla pleiv. Purschida culturala d'uniuns indigenas. Ingress festiv en fuorma da processiu neu dil vitg da Sedrun e da Rueras anora.
5. Processiu sil Gotthard - spassegiada en regurdientscha dalla anteriura processiu. Accumpignament da personas che declaran historia, fauna e flora.
6. Concert da stad - concert per la giuventetgna cun las Liricas e Clean, ils 2 da fenadur 2005 en sala da scola a Sedrun, cun patratgs religius en fuorma d'ina devoziun.
7. Notg da film ils 5 d'uost 2005 - films che muossan ni presentan occurrenzas religiusas.
8. Workshop per ils affons ils 16 da settember 2005 - luvratoris entras personas qualificadas e differentas purschidas adattadas als scalems. Gentar communabel.
9. Ils 2 d'october 2005 - fiasta dil s. Rusari. Fiasta da cuminonza culs vischins da Muster, Medel, Andermatt ed Olivone - treis lungatgs sentaupan. Messa festiva en claustra a Mustér silsuenter processiu viers la halla plurivalenta. Purschida culturala dallas uniuns vischinontas - gentar communabel en halla.
10. Concert giubilar ils 25 da december 2005 cul Chor baselgia e Cantus firmus.
11. Occurrenza finala da Silvester - terminaziun digl onn giubilar. Devoziun en baselgia cun cant e gloria. Silsuenter pushegn da Silvester/Daniev.

La suprastanza dalla pleiv ei pertscharta che l'organisaziun da tuttas occurrenzas prenda bia engaschi ed ei in grond buordi. Ella ei denton satisfatga da saver porscher a parochianas e parochians in vast program per igl onn da giubileum. Ils cuosts approximativs per tuttas occurrenzas ein vegni calculai cun rodund 60'000.00 francs. Legreivla mein separticipescha la vischnaunca politica cun frs. 15'000.00 vid ils cuosts.



Regulativ d'indemnisaziun per survetsch da baselgia per las pleivs da Medel, Mustér e Tujetsch

Quest regulativ normescha l'indemnisaziun per il survetsch da baselgia dallas treis pleivs. Da principi vegnan tuts survetschs da baselgia dallas treis pleivs exequi entras ils plevons engaschai, dapresent: sur Alexi Manetsch, sur Ozioma Nwachukwu, sur Albert Wangler e sur Benni Varghese. Ei ha denton semussau el davos temps che quels plevons san buca exequir enqual survetsch. Ensemen culs secretariats vegn il plan pils survetschs da baselgia fixaus entras il plevon responsabel. Semuossa il cass ch'igl ei buca pusseivel d'exequir in survetsch, sa suenter consultaziun e sclariment entras il plevon responsabel, vegnir engaschau in plevon gidonter. Per quellas lavurs vegn il plevon gidonter idemnisaus sco previu el regulativ.

Persunas che han specials giavischs per in survetsch da baselgia (sco per exempel spiritual preferiu) han da pagar las indemnisaziun sco previu per ils plevons gidonters. Pli- navon ei vegniu reglau per persunas che pagan buca taglia en nossas pleivs, (exepiu

persunas ch'ein naschidas e carschidas si ellas pleivs) vulan denton far diever d'in survetsch da baselgia da nossas pleivs, sco per exempel battens, nozzas, sepulturas. Per quels survetschs incasseschan las pleivs ina summa commensurada che va dabien al spiritual, caluster, ordinatur, ministrants e per il diever dalla baselgia ni caplutta. Ils ugaus baselgia, respectiv ils calusters incasseschan l'indemnisaziun ed ein responsabels per la repartiziun als pertuccai. Per persunas extradadas dalla baselgia e per las qualas la parentella giavischa ina sepultura, tschenta la pleiv pertuccada in quen da 700.00 francs che vegn repartius (frs. 150.00 per spiritual, frs. 400.00 per diever dalla baselgia, frs. 50.00 per caluster, frs. 50.00 per ordinatur, frs. 30.00 per rusaris, frs. 20.00 per ministrants). Per las messas commemorativas senza publicaziun vegn incassau il stipendi da frs. 10.00 e per messas commemorativas cun publicaziun frs. 20.00. Quei regulativ ei vegnius mess en vigur cun igl 1. da schaner 2005.

Creisma

Ils 25 d'avrel 2004 havein nus festivau la s. Creisma. Las annadas 1991/92/93 ein vegnidas cresmadadas. Igl anteriur avat, Pancraz Winiker da Mustér, ha festivau cun nus quella fiasta e cresmau ils affons.

*«Neu nies scaffider, car sogn Spert,
nus dai las grazias, dai confiert.
Viseta nus o dun de Diu,
nos cors che ti has tez scaffiu.*

*Il consolader eis numnaus,
in dun dal Bab nus regalaus.
Fontauna viva, fiug,
amur dil Bab perpetna tarlischur.*

*Els cors o fai ch'ei vegni dis
cun la carezia dil parvis.
Conforta nossa fleivladad,
dai a nus tuts la sanadad.*

*Nos inimitgs fugenta bein,
nus dai la pasch cumpleinamein.
Nies bien mussader va avon,
la sontga via nus mussond».*



Sperond ch'il Sogn Spert sclareschi ed empeiili ils affons sin lur via, giavischein nus ad els tut bien.



Santeri s. Vigeli

Il Segner ha dau - il Segner ha priu - siu num seigi benedius

En nossas baselgias e capluttas ein enteifer igl onn, 10 affons vegni battegiai. Da nossa pleiv eis ei stau 4 affons che han retschert ils s. Sacrament dil batten. Ad affons e geniturs giavischein nus bia legria ed in bien prosperar en nossa cuminonza cristiana. Lètgis uonn 2 vegnidas enzinnadas en nossa pleiv. Als spusai cordiala gratulaziun e tut bien en la veta matrimoniala.

« Mira viers tschiel, si egl ault tiel Signur - sentas siu maun che Tei meina... »

Uonn ha il Segner menau a casa tier il Bab 13 da nos commembers. Per els ei il viadi terrester ius a fin e la porta dil parvis ei seviarta. Els ein entrai avon la fatscha da Diu e gaudan ussa la beadadad dil tschiel. Per nus laian els anavos ina gronda largia, ils fastitgs dad els ein denton aunc adina presents. Perquei lein nus esser engrazieivels che nus havein astgau haver els, ch'els ein stai cheu tier nus ed han enrihiu nossa cuminonza. Il Segner regali ad els la pagaglia perpetna. Els ruaussien en pasch.

Midadas tier il personal

Dapi 2 onns ei sur Albert Wangler engaschau en las treis pleivs sco augsegner gidonter.

Nus enconuschein el sco plevon aviert, denton era empau provocativs. Ses priedis han meinsvart dau da patertgar ed era discussionar. Igl ei aunc mai vegniu discussionau ton sur dalla baselgia en general e sur dil priedi sco duront igl engaschament da sur Wangler. Ses patratgs e sia demananza han buca plaschiu a tuts. Beinenqualin ei buca staus da siu meini ed ei ha perquei era muncau capientscha e toleranza da nossa vart. Il proverbi tudestg di denton: «Allen recht getan, ist eine Sache die niemand kann» - pia far endretg a tuts ei negin che sa. Igl ei denton iu aschi lunsch che brevs e telefonats han anflau la via entochen tier igl uestgiu. E la finfinala ha igl ordinariat episcopal da Cuera buca elegiu pli sur Wangler sco plevon gidonter per nossas treis pleivs. Aschia ha il contract denter las pleivs e sur Wangler stuiu vegnir sligiaus si sin la fin da mars 2005. La suprastanza dalla pleiv da Tujetsch engrazia ad el grondamein per la buna lavur ed engaschi en favur da nossa cuminanza. Tier bein enqualin da nus vegn el a restar en buna ed engrazievla memoria. Nus giavischein ad el sin siu viadi terrester bia bien e ch'el entaupi biars carstgauns che carezan ed apprezzeschan el. Possien cletg, buna sanadad e la cuntentientscha accumpignar el.

Cun l'entschatta da december 2004 havein nus saviu engaschar sur Benny Varghese, naschius ils 16 da matg 1968 a Kerala/India. El ei vegnius engaschus sco plevon gidonter per las 3 pleivs en pensum cumplein. Entochen ch'el ei sevivius en, eis el secasaus a Mustér tier sur Alexi Manetsch. Aschigleiti ch'el drova buca pli agid vegn el a prender dimora en casa pervenda a Sedrun. Nus sperein bugen che nus haveien anflau cun sur Benny Varghese in plevon che vegn acceptaus e purtaus dil pievel. Ad el fagein nus in cordial beinvegni cheu tier nus e nus sperein bugen ch'el anfli tier nus in cauld dacasa.

Engraziament

Alla fin da nies rapport vulein nus engraziar a Vos preziadas parochianas e parochians per Vies sustegn e Vossa sensibilitad en favur dils basegns da nossa pleiv. Cun Vies agid e sustegn gideis Vos nus ad ademplir l'incumbensa surdada a nus. Segiramein va ei buca adina sco mintgin giavischa, denton sespruein nus da far tut il pusseivel per in bien prosperar en nossa cuminanza. Il bien prosperar en ina cuminanza dependa allura era digl engaschament da mintga commember. Ei nezegia nuot d'haver plevons en nossa pleiv che fan dumengia per dumengia messa, mo ils commembers muossan negin interess. Buca mo la giuventetgna maunca en las baselgias, igl entir pievel ei buca presents. Nus lein engraziar a Diu che nus havein aunc augsegners che celebreschan las s. messas, era sche mo paucs teidlan il plaid da Diu. Ha Dieus veramein da dir nuot pli a nus?

Cordial engraziament admettein nus als augsegners, sur Alexi Manetsch, sur Ozioma

Nwachukwu, sur Albert Wangler e sur Benny Varghese per tut lur buna lavur. Era als spirituals che segidan cun els en lur grond uffeci, in sincer Dieus paghi. Vegli Dieus era gidar els ad ademplir l'incumbensa d'annunziar igl evangeli da Niessegner Jesus Cristus. Dieus paghi era als spirituals dalla Casa s. Vigeli, sur Placi Huonder, sur Christian Monn e sur Giusep Berther per lur buns survetschs.

Plinavon lein nus era engraziar;

- als responsabels dalla ductrina per nos affons, allas dunnas per il salid dil Segner,
- allas calustras e calusters cun lur gidonters, als ugai da baselgias e capluttas,
- als organists, al secretariat, al cussegl pastoral, allas differentas uniuns ed als ministrants
- alla cumissiun ed ils architects dalla restauraziun baselgia s. Vigeli
- a Vus ch'essas forsa vegni emblidai - ed a Vus tuts che ureis e canteis en honor dil Tutpussent.

Vegli era Dieus il Signur sur veta e mort remunerar Vus tuts per Vies engaschi en favur da sia vegna. Ils suandonts plaids d'ina canzun duein gidar nus a mirar si enviers il tschiel.

*«Tutpussent altissim Diu, Tei ludein cun vusch cumina
Avon Tei ch'has tut scaffiu, gl'univers entir senclina.*

*Ilis avdants dil sogn parvis, Tei aduran en perpeten
Senza mai vegnir unfis, senclinond von tei repetan
Ti eis il grond signur, Ti meretas tutt'honor».*

Rueras, avrel 2005

Per la suprastonza dalla pleiv da Tujetsch

Il president:
Tadeus Giossi

Rapport annual 2004 dil Cussegl pastoral Tujetsch

Preziadas conparochianas e prezias conparochians

In onn d'uffeci sauda puspei al vargau, cun in cuort rapport lessel dar a Vus plaid e fatg sur dil curriu e passau en nies cussegl.

Program da lavur

- Sogns retgs
- Di da suppa
- Aperitivs Rueras e Sedrun
- Segidar da Rogaziun Federala
- Punsch per sentupada dalla giuventetgna
- Segidar culla vestgadira da Sontgaclau

Sogns retgs

La canzun dil pign schumbrader ch'il scolast Beni Hendry ha mussau als affons ei stada bellezza. El ei adina buns per bialas surpresas, ed era ils affons ein stai loschs d'astgar cantar enzatgei niev. Biars geniturs ein puspei stai a disposiziun per transports e tscheinias, per la schminca astgein adina clamar la dunna Astrid Monn.

Di da suppa

Sch'ins drova per fiastas che vegnan fatgas el liber bial'aura, ston ins magari dir ch'ella seigi dada ell'aua. Tier il di da suppa san ins dir ch'el seigi daus el sulegl. Paucas dumengias digl unviern 2004 ein stadas aschi bialas sco la dumengia dil di da suppa. La buna suppa da nies premurau cuschinier Nazi Schmid havess aunc tunschiu inagada per tonta gliעד. Donn!

Aperitivs

Sco gia in per onns usitau offerescha la Pleiv da Tujetsch aperitivs da perdanonza a Rueras e Sedrun. Star suenter messa ni processiu in mument ensemen, sentupar e dar ina paterlada cun fatschas ch'ins vesa buca mintgadi vegn apprezziau da biars.

Rogaziun Federala

Da Rogaziun Federala engraziein a Diu per la buna raccolta, raccoltada in onn ora. Quei survetsch divin han il catechet Venzin Hubert e Sur Ozioma capiu da prepar cun plaid e musica. Las baselgias han nossas calustras ornau cun bien maun e gust. Ch'ellas han plascher da lur lavur sentin e vesein nus da quellas occurrenzas tut aparti.

Sontgaclau

Dapi la davosa missiun saudan ils vestgius da Sontgaclau e sia suite alla pleiv. Aschia ina lavur supplementara per nosssa calustra. Sch'ella sto schubergiar e cuntschar quels ei quei ina horenta lavur. Perquei stattan adina in per femnas dil Cussegl pastoral a dispoziun per segidar.

Sentupada dalla giuventetgna

Entschatta december ha sur Ozioma celebrau ina messa da giuventetgna. Silsuenter spassegiada da tizuns naven da Sedrun a Dieni cun differents posts da meditaziun, nua ch'ei ardeva adina in fiug. Quei suentermiezdi ha el telefonau e giavischau che nus organiseschien 10-12 liters punsch a Dieni sco finiziun dalla spassegiada. La messa ei stada frequentada pulit, mo enta Dieni han mo 3 giuvnas e sur Ozioma stuiu beiber ils 12 liters punsch!

«Es war trotzdem schön und andächtig!» ein stai ils plaids da sur Ozioma.

Tenor nos statuts sut artechel 2 pensums stat denter auter:

- **Accumpignament dils ministrants/** cun giavisch da sur Ozioma havein empruau, giu pauc sustegn dils pertuccai. Tgei lu?
- **Pastoraziun dalla giuventetgna duront e suenter ils onns da scola, scolaziun religiusa, promover e sustener iniziativas dalla giuventetgna/** tgi ei pli cumpetents che sur Ozioma per quellas lavurs. Cun tgierp ed olma emprova el sin tuttas modas da motivar giuventetgna. Sia savida e sias ideas han cheu negins confins. Aber!
- **Liturgia, formar il survetsch divin, devoziuns, celebrar ils sacraments/** cheu havein nus ina fetg engaschada gruppa liturgica. Engrazia!
- **Scolaziuns dils carschi, scolaziun e formaziun religiusa profundaziu/** sin in inse-

rat ella Tuatschina igl onn 2003 ei 1 persuna s'interessada. ???

- **Scadinass lavurs che vegnan exequidas dallas uniuns dueien restar vinavon ad ellas/** nossa uniun da dunnas Tujetsch fa in bien ton da quellass lavurs. Quellass dunnass s'engaschan cun bia carezia e capientscha per giuven e vegl. Compliment ed engraziament!

Pia vid bunass ideass e meiniss maunca ei buca, denton maunca il sustegn e la capientscha per enzatgei niev. Sch'ei dat neginass midadass ei la causssa lungurussa, il cuntrari seigi sesplanghegiem e segloriem. Ussa schei mo, co lein tschappar lass hottass e far il meglier ordlunder.

Engraziament

Biara glied Tuatschina sengascha cun plascher e perschuasiun per il beinstar da nossa pleiv. Senza igl agid dils parochiantss/tass havessan nus buca sempel da contonscher nies pensum.

In cordial engraziament sauda segir en emprema lingia a nos premurass spirituals sur Alexi, sur Ozioma e sur Wangler. Senza schar pender la bratscha lavuran els per il beinstar da nossa pleiv. Alla gruppa liturgica ed allas mummas dil survetsch divin preeucaristic medemamein in sincer Dieus paghi. Bugen engraziel era alla supprastonza da pleiv cun lur president Tadeus Giossi. In meritau engraziament a nossass premuradass e nunstuncienteivlass calustrass e caluster, als chors e lur dirigents, als organists, a tuttas autrass uniuns e semplamein a mintgin che segida per il beinstar da nossa pleiv. Sco davoss lessel engraziar a mes collegass dil Cussegl pastoral che sustegnan mei cun plaid e fatg.

Sedrun, avrel 2005

Per il Cussegl pastoral
Rebecca Loretz

Bilanza per ils 31-12-2004

Activas

Facultad currenta

Conto banca Cantunala	201.55
Conto banca Raiffeisen	123'177.00
Debiturs	6'048.15
Dabien taglia da cult	218'340.10
Dabien taglia anticipada	27.55
Activas transitoricas	0.00

Facultad piazzada

Casa parvenda Sedrun	269'000.00
Casa parvenda veglia Sedrun	165'000.00
Casa parvenda Rueras	137'000.00
Casa parvenda Selva	170'000.00
Baghetg Selva	35'500.00
Faner Rueras	7'600.00
Prau agricol	20'000.00

Tetels da valor

Conto da spargn BRT	648.00
Emprest baselgia s. Vigeli	5'000.00
Emprest Caplutta s. Clau	00.00

Passivas

Capital jester

Crediturs	77'185.00
Creditur «Taglia Fontauna»	10'740.90
Deivet hipotecar	120'000.00
Passivas transitoricas	35'000.00

Agen capital e reservas

Agen capital	906'296.65
Reserva manten.baghetgs e baselgias	0.00
Gudogn/sperdita digl onn	8'319.80

Total activas/passivas	1'157'542.35	1'157'542.35
-------------------------------	---------------------	---------------------

Quen da cult pigl onn 2004

Expensas

Cuosts da personal/instanzas

Pagas	143'242.20
Pagas e cuosts suprastonza	27'925.60
Pagas augsegners gidonters	1'749.95
Pastoraziun da giuventetgna CADI	7'185.00
Cuors da perfecziun	7'481.60
Cussegl pastoral	1'000.00
Agid vid la pastoraziun	-.-
Cassa da cumpensaziun AVS	13'940.20
Cassa da pensiun	8'198.95
Cassa da malsauns ed accidents	1'462.40
Ulteriurs cuosts da personal	6'442.85

Cuosts casas baghetgs ed indrezs

Manteniment casas	44'507.40
Manteniment baghetgs	797.00
Manteniment indrezs	-338.35
Indrez alarm s. Vigeli	331.80
Manteniment e cuosts dad orglas	1'618.00
Manteniment baselgias	83'717.70
Lavurs da conturon	1'467.50
Ieli/electricitad/aua	5'159.15
Serenera/canalizaziun/miardas	3'948.00

Cuosts generals

Tscheins e spesas da banca	3'870.85
Taglias / taxas	1'230.00
Segiradas	2'377.05
Spesas auto/tel. a plevons	3'688.00
Contribuziuns	13'337.95
Ulivaziun sperditas	26'000.00
Festivitat 800 onns s. Vigeli	20'000.00
Incasso taglia	6'959.85
Uorden per dar ductrina	4'067.30
Stampats / inserats	5'598.75
Material da biro / EDV	1'751.90
Portos telefon ect.	1'015.75
Spesas suprastonza e personal	332.50
Consumaziuns radunonzas/sesidas	413.00
Ulterius cuosts generals	5'754.30
Deducziuns	13'700.00

Total expensas

469'934.15

Entradas

Taglias

Taglia da cult	264'058.40
Taglia alla fontauna	125'923.95

Tscheins

Tscheins casa	40'350.00
Tscheins activs	109.25
Tscheins da praus e teren	6'111.00
Parcadis / Piazza da sport	29'879.00
Tschaler da schurmetg	3'656.00

Contribuziuns

Contribuziun caluster	1'500.00
Contribuziun ductrina	6'000.00
Bunamanas sontget Gediun	.-
Diversas intradas	666.35

Total entradas **478'253.95**

Cumparegliaziun:

Total expensas/entradas	469'934.15	478'253.95
Fatg anavon	8'319.80	
Total	478'253.95	478'253.95

Preventiv 2005

Expensas	Quen 2004	Preventiv 2005
Cuorst da personal / instanzas		
Pagas	143'242.20	150'000.00
Pagas e cuost suprastonza	27'925.60	28'000.00
Pagas augsegners gidonters	1'749.95	5'000.00
Pastoraziun da giuventetgna CADI	7'185.00	7'200.00
Cuors da perfecziun	7'481.60	3'000.00
Cussegl pastoral	1'000.00	2'000.00
Agid vid la pastoraziun	0.00	1'000.00
Cassa da compensaziun AVS	13'940.20	15'000.00
Cassa da pensiun	8'198.95	9'000.00
Cassa da malsauns ed accidents	1'462.40	2'000.00
Ulteriurs cuosts da personal	6'442.85	6'000.00
Cuosts immobilias ed indrezs		
Manteniment casas	44'507.40	10'000.00
Manteniment baghetgs	797.00	2'000.00
Manteniment indrezs	-6.55	5'000.00
Manteniment e cuosts dad orglas	1'618.00	2'000.00
Manteniment baselgias	83'717.70	50'000.00
Lavurs da conturon	1'467.50	2'000.00
Ieli/electricitad/aua	5'159.15	5'000.00
Serenera/canalisaziun/miardas	3'948.00	4'000.00
Cuosts generals		
Tscheins e spesas da banca	3'870.85	3'800.00
Taglias / taxas	1'230.00	1'300.00
Segiradas	2'377.05	2'600.00
Spesas auto/tel. a plevons	3'688.00	3'700.00
Contribuziuns	13'337.95	20'000.00
Ulivaziun sperditas	26'000.00	30'000.00
Festivitat 800 onns s.Vigeli	20'000.00	20'000.00
Incasso taglia	6'959.85	7'000.00
Uorden per dar ductrina	4'067.30	5'000.00
Stampats / inserats	5'598.75	6'000.00
Material da biro, eed, porti ect.	2'767.65	3'000.00
Spesas supr./consumm.radunonzas	745.50	1'500.00
Ulterius cuosts generals	5'754.30	6'000.00
Deducziuns	13'700.00	14'000.00
Total expensas	469'934.15	432'100.00

Entradas

Taglias

Taglia da cult	264'058.40	240'000.00
Taglia alla fontauna	125'923.95	110'000.00

Tscheins

Tscheins casa	40'350.00	40'000.00
Tscheins activs	109.25	200.00
Tscheins da praus e teren	6'111.00	6'000.00
Parcadis / Piazza da sport	29'879.00	30'000.00
Tschaler da schurmetg	3'656.00	5'000.00

Contribuziuns

Contribuziun caluster	1'500.00	1'500.00
Contribuziun ductrina	6'000.00	6'000.00
Bunamanas sontget Gedius	0.00	0.00
Diversas intradas	666.35	0.00

Total entradas

478'253.95 **438'700.00**

Survesta

Perventiv/Quen

Total entradas	478'253.95	438'700.00
Total expensas	469'934.15	432'100.00

Sperdita / Gudogn

8'319.80 **6'600.00**

Revista dil quen 2004 dalla baselgia s. Vigeli

Entradas

Unfrendas	16'599.25
Bunamanas/Contribuziuns	8'000.00
Tscheins bruts	872.45
Sustegn Pleiv	5'000.00
Restituziun messas fundadas	4'500.00
Contribuziuns per donns	0.00

Total entradas **34'971.70**

Expensas

Segiradas/taxas	3'907.95
Energia	10'597.80
Stipendis messas fundadas	1'320.00
Embelliments	842.60
Candeilas	241.20
Vins/hostias	1'422.00
Manteniments	103.00
Tscheins/spesas banca	192.25

Total expensas **18'626.80**

Surpli entradas **16'344.90**

Il cassier: Simeon Cavegn

Revista dil quen 2004 dalla baselgia s. Giachen

Entradas

Unfrendas	6'967.75
Glischettas	2'947.85
Bunamanas	10'000.00
Restituziun messas fundadas	2'750.00
Tscheins	170.85

Total entradas

22'836.45

Expensas:

Segiradas/taxas	2'071.75
Energia	6'545.60
Stipendis messas fundadas	870.00
Candeilas	215.40
Vins/hostias	274.50
Manteniments	630.75
Tscheins/spesas banca	1'473.60

Total expensas

12'081.60

Surpli entradas

10'754.85

Il cassier:

Simeon Cavegn

Facultad baselgias e capluttas

Sedrun: Baselgia s. Vigeli	Facultad	22'190.15
Ugau e caluster:	Deivet	5'000.00
Deplazes Ursula	Fondo messas fundadas	194'960.00
Rueras: Baselgia s. Giachen	Facultad	-836.40
Ugau e caluster:	Deivet	118'700.00
Monn Imelda	Fondo messas fundadas	110'310.00
Selva: Baselgias s. Gion e Paul	Facultad	55'925.80
Ugau e caluster:	Fondo messas fundadas	28'250.00
Monn Flurin		
Tschamutt: Caplutta s. Clau	Facultad	4'871.90
Ugau: Giossi-Maissen Veronica		
Giuv: Caplutta s. Bistgaun	Facultad	18'973.24
Ugau: Monn G. Giachen		
s. Brida: Caplutta s. Brida	Facultad	17'342.60
Ugau: Monn Flurin		
Zarcuns: Caplutta Nossadunna	Facultad	12'997.80
Ugau: Schmid Vigeli		
Camischolas: Caplutta s. Onna	Facultad	-752.00
Ugau: Cavegn Venanzi	Deivet	20'000.00
Bugnei: Caplutta s. Giusep	Facultad	45'290.20
Ugau: Solèr Ambrosi		
Surrein: Caplutta s. Antoni	Facultad	36'814.90
Ugau: Loretz Jovita		
Cavorgia: Caplutta s. Leci	Facultad	5'732.90
Ugau: Hendry Ursulina		

Rapport dils revisurs da quen

Per la radunonza generala dalla Pleiv da Tujetsch

Stimada suprastonza

Stimadas commembras, stimai commembers dalla Pleiv da Tujetsch

La revisiun dil quen 2004 ei vegnida fatga entras ils 2 revisurs en preschient-scha dil cassier sonda, ils 2 d'avrel 2005. Tier nosa controlla havein inspectau quen e bilanza sco era ils quens dallas baselgias e capluttas. Sco usitau ei il quen menaus conform alla contabilitad moderna schuber e bein. Tut ils mussaments ein avon maun e corrispundan allas cudischazi-uns. Tier tut nossas damondas ha il cassier saviu porscher il sclariment giavischau.

Sin fundament da nosa controlla proponin nus alla radunonza generala:

- a. dad approbar il quen e bilanza 2004 dalla Pleiv da Tujetsch*
- b. da dar scarica a cassier e tuts funcziunaris dalla suprastonza*
- c. dad admetter al cassier Simeon Cavegn in cordial Dieus paghi per siu grond engaschi.*

Sedrun, avrel 2005

Ils revisurs:

Linus Vincenz

Hubert Venzin

Officials dalla Pleiv Tujetsch

Suprastonza dalla pleiv

president

Giossi Tadeus, Rueras

vicepresidenta

Cavegn Ursulina, Camischolas

actuara

Hitz-Schmid Rita, Rueras

cassier

Cavegn Simeon, Sedrun

Monn Ignazi, Sedrun

sur Manetsch Alexi, Sedrun (ex off.)

sur Nwachukwu Ozioma, Sedrun (ex off.)

sur Albert Wangler, Sedrun (ex off.)

Post da contact

Cavegn-Flury Margrith

Revisurs da quen

Vincenz Linus, Rueras

Venzin Hubert, Rueras

suppleants

Berther Victoria, Gionda

Venzin Mudest, Rueras

Ugaus baselgias e capluttas

Tschamut

Giossi Veronica, Sedrun

Selva

Monn Flurin, Selva

S.Brida

Monn Flurin, Selva

Giuv

Monn Gion Giachen, Rueras

Rueras

Monn Imelda, Rueras

Zarcuns

Schmid Vigeli, Zarcuns

Camischolas

Cavegn Venanzi, Camischolas

Sedrun

Deplazes Ursula, Sedrun

Sontget dils gadius

Deragisch Valentin, Sedrun

Bugnei

Solèr Ambrosi, Bugnei

Surrein

Loretz Jovita, Surrein

Cavorgia

Hendry Ursulina, Cavorgia

Organists/as

Berther-Berther Rita, Rueras

Pally-Brugger Vinzens, Rueras

Schmid-Bläsi Fabiola, Cuera

Steinacher Erica, Turitg/Mustér

Dirigents dils chors

baselgia Sedrun
baselgia Rueras

Hendry Benedetg, Sedrun
Hendry Tarcisi, Sedrun

Calustra Sedrun

Deplazes Ursula, Sedrun

Calustra Rueras

Monn-Monn Imelda, Rueras

Caluster Selva

Monn Flurin, Selva

Cussegl pastoral:

presidenta
actuara
cassiera

Loretz-Berther Rebecca, Sedrun
Berther-Monn Claudia, Camischolas
Schmid-Cavegn Barla, Rueras
Cavegn-Monn Daniela, Gionda
Cavegn-Bisquolm Ursulina, Camischolas
Deplazes-Monn Ursula, Sedrun
Hendry Rafaela, Sedrun
Monn-Monn Imelda, Rueras
Munsch Marcus, Sedrun
sur Manetsch Alexi
sur Nwachukwu Ozioma
sur Wangler Albert

ex. officio:

Ductrina

Berther-Loretz Letizia, Camischolas
Cavegn-Bisquolm Ursulina, Camischolas
Curschellas-Berther Anna, Sedrun
Estermann-Schmid Ervina, Gionda (-31-08-04)
Flury-Tanner Yvonne, Camischolas
Venzin Hubert, Rueras

**Parter ora la s.communiun,
lecturs/as, survetsch preu-
caristic e gruppa liturgica**

Andreoli-Schmid Alice, Gionda
Berther-Sommer Bruno, Reuras
Berther-Decurtins Tumaisch, Gionda
Berther-Tuor Barla, Rueras
Cathomen-Giossi Nicolina, Rueras
Cavegn-Flury Margrith, Sedrun
Cavegn-Fry Barla, Rueras
Cavegn-Monn Daniela, Gionda
Cavegn-Berther Franzisca, Sedrun

Cavegn-Giger Nesa, Sedrun
Decurtins-Jägler Nicole, Sedrun
Deplazes-Monn Ursula, Sedrun
Giossi-Maissen Veronica, Dentervitgs
Hendry Rafaela, Gionda
Monn-Monn Imelda, Rueras
Monn-Jacomet Marianna, Sedrun
Monn-Jacomet Sep Andriu, Sedrun
Munsch-Vincenz Marcus, Sedrun
Schmid-Manetsch Vigeli, Zarcuns
Soliva-Flepp Marcel, Sedrun
Venzin Hubert, Rueras
Vinzens Patrizia, Sedrun

Sminca s. retgs

Monn-Schlosser Astrid, Camischolas
Venzin Hubert, Rueras